

առաջնապի, ճակատի քայքայման և բոլշևիկների գրգռիչ գործունեութեան առաջն առնել: Դաշնակից պետութիւնների ճիգերն էլ այս ուղղութեամբ չօշափելի օգուտ չկարողացան տալ: Փորձ եղաւ, յունիսին, երկրի ու բանակի տրամադրութիւնը բարձրացնելու նպատակով, արեւմտեան ճակատում ընդհանուր յարձակման անցնելու, բայց յաջողութիւն չունեցաւ: Այդ փորձը ցոյց տւեց, թէ որքան խորն էր բարոյալքումը երկրի և բանակի մէջ: Օգտուելով զօրքի դժգոհութիւնից, յունիսին, բոլշևիկները փորձեցին առաջ բերել զինւած ապստամբութիւն, որ թէև ճնշւեց, բայց ցոյց տւեց, թէ որքան լայն ծաւալ է ստացել անիշխանութիւնը:

Դրանից յետոյ յարարեցութիւններն աւելի ևս սրւեցին: Պետական խորհրդակցութիւնը, որ հրաւիրւեց ամառը Մոսկւայում, է՛լ աւելի շեշտեց արտաքին ու ներքին քաօսը և յեղափոխութեան համար ստեղծւած անտանելի կացութիւնը: Տաղնապն ու դժգոհութիւնը արտայայտւում էր բազմաթիւ ձևերով. բանակի ոգին արագ ընկնում էր, դասալքութիւնը դառնում էր տարերային երեւոյթ, հաղորդակցութիւնը խանգարւում էր, ապրուստը սղում տարապայմանօրէն, խանութների առջև կազմւում էին երկար ու ջղայնացնող հերթեր. խորանում էր վիճը արդիւնաբերող ու բանւորական խաւերի միջև. բանւորութիւնը դժգոհ էր իր տնտեսական և իրաւական վիճակից: Գիւղացիութիւնը տրտնջում էր, որ հողաբաժանումը ուշանում է: Այստեղ ու այնտեղ բռնկւում էին գիւղացիական անկազմակերպ շարժումներ և կալւածատէրերի արտաքսումներ: Կառավարութիւնը հեղինակութիւն և ոյժ չունէր այս բոլորի առաջն առնելու, անգամ վարչապետ Լվովի հրաժարումից և ա՛յն ժամանակւայ հոգիների վեհապետ Ա. Բերենսկիի վարչապետ դառնալուց յետոյ:

Իբրեւ հակադդեցութիւն այս դրութեան, բանակի սպայութեան և բուրժուական շրջանների մէջ աճում էր անբաւականութիւնն ու դայրոյթը երկրի ղեկավարներից: Պահանջւում էր ուժեղ ու կտրուկ իշխանութիւն: Այդ պահանջի արտայայտութիւն հանդիսացաւ, այսպէս կոչւած, կորնիլովեան շարժումը, երբ բանակի որոշ զօրամասեր զօր. Կորնիլովի գլխաւորութեամբ քայլեցին մայրաքաղաքի վրա՝ իշխանութեան բռնի փոփոխութիւն կատարելու դիտաւորութեամբ:

Այդ շարժումը թէև ճնշւեց, բայց իր հերթին ուժեղացրեց ծայրայեղ ձախ տարրերը, բոլշևիկներին, որոնց ձեռքին ուժեղ գէնք էր և՛ Սահմ. Ժողովի գումարման ձգձգումը: Լայնածաւալ և պատերազմական կեանքով ապրող կայսրութեան մէջ այնքան էլ հեշտ չէր ամենակատարեալ ձեւով ընտրութիւններ կատարելը: Սահմ. Ժողովի պակասը լրացնելու մտահոգութեամբ հրաւիրւեց դեմոկրատական խորհրդակցութիւն: Հրապարակ դրւեց նախապարլամենտ կազմելու ծրագիրը: Բայց այդ բոլորը արդէն աւելորդ փորձեր էին: Երկիրը հասունացել էր ուրիշ դէպքերի համար: Հոկտ. 25-ին, Պետրոգրադում տեղի ունեցաւ բոլշևիկեան յեղաշրջում: Կազմւեց Ժողովրդական Կոմիսարների խորհուրդ: Ժամանակաւոր Կառավարութիւնը ցրիւ եկաւ: Նրա անդամներից ոմանք, ինչպէս և նոր ընտրւած Սահմ. Ժողովի